



11. februaq 2022

UPA2022/105

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Oqaatsuni oqaluffiornissaq siunertaralugu sanaartornissamut pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartuni ilaasortaq Doris Jakobsen Jensen, Siumut)

**Tunngavilersuut:**

Oqaatsuni oqaluffik 1957-imi atoqqaarfissiorneqarpoq ukiorpassuillu atuarfittut oqaluffittullu innuttaasunik atorneqarluni.

Ukioq kingulleq Oqaatsuni oqaluffik atuarfiutigisoq matuneqarpoq illutaata ulorianartumik oqoqarpallaarnera tunngavigalugu.

Oqaatsuni atuartut Illu Sullivimmut nuutinneqarput, inuit uffariartut errorsisullu akornanni atuartinneqartarlutik. Paasisakka tunngavigalugit nutaamik atuarfiliornissaq kommunimit sulissutigineqarpoq.

Oqaatsuni oqaluffiup atorunnaarnera tunngavigalugu juullimi ukiutoqqamilu innuttaasut Illu Sullivimmi naalagiarinneqarput inissalli annikipallaarnera tunngavigalugu inuit ikitsuarannguit kisimik isersimallutik.

Oqaatsuni oqaluffik ima oqussimatigaaq maannakkut iserfigeqqusaanngilaq peqqissutsimut annertuumik ulorianaateqarmat. Nassuiaasoqarsimavoq oqunna ima ingasatsigisoq ajornerpaamik pisoqassappat oqok taanna toqussutaasinnaasoq. Taamaattumik Oqaatsuni innuttaasut kissaatigaat nutaamik oqaluffittaarnissartik.

Tunngavilersuutikka innersuussutigalugit neriuutigaa siunnersuut taperserneqarluni Oqaatsuni nutaamik oqaluffiornissaq aqqutissiuunneqassasoq.



**Pisortanut aningaasatigut allaffissornikkullu kingunerisassat:**

Oqaatsuni innuttaasut amerlassusii aallaavigigaanni missiliukannerlugu oqaluffiup angissusissaa 100 m<sup>2</sup>-iussasoq. Aammalu nunarfimmi oqaluffiliorneq naliginnaasumik akisunerusinnaasoq mianersortumik missingiut pilersaarusionermut sananermullu atugassat kr. 5 mio ikinnerunngitsut immikkoortittariaapput. Aallaavigneqarpoq kvadrat miterimut kr. 50.000.

Taamaassappat ikinnerpaamik kr. 750.000 pilersaarusionermut immikkoortittariaqarput. Tamannali siusippallaarpoq ersarinnerusumik naatsersussallugu pilersaarusionermi sulisussarsiulernermilu ersarinnerulernissaa naatsersuutigisariaavoq.

**Namminersorluni inuussutissarsiuteqarnermut aningaasatigut allaffissornikkullu kingunerisassat:**

Soqanngilaq

**Innuttaasunut aningaasatigut allaffissornikkullu kingunerisassat:**

Soqanngilaq